


Minister Benny Sevinger:

Aruba lo conoce un expansion grandi di su infraestructura durante 4 aña



ORANJESTAD(AAN): Den e plan di Gobernacion 2013-2017, Gabinete Mike Eman II ta sigui pone enfasis den mehoracion di infraestructura di Aruba. E ta inclui no solamente renobacion/mantenion di edificio, y hiba iluminacion den tur skina di Aruba, pero tambe un mehoracion di e careteranan di Aruba. Esta construccion di camindanan nobo y mantenion di otronan. Esaki ta loke Minister

encarga cu Infraestructura, Benny Sevinger, a trece dilanti den un conferencia di prensa teni e siman aki, unda el a splica vision di Gobierno pa e proximo cuatro añanan. E mandatario a bisa cu lo sigui cu e maneho di e prome gobernacion di Gabinete Mike Eman, invertiendo 15 miyon florin anualmente, via di e fondo WIF. E plan pa cu careteranan ta wordo reparti segun importancia, den tres diferente tipo. Camindanan

principal, esnan cu ta conecta bario cu e camindanan principal y camindanan den e barionan. Tur e trabounan aki ta wordo reparti segun e fondo di WIF, cu excepcion di esnan cu ta wordo financia via di e sistema di PPP, manera Green Corridor y Ringweg 3. Sevinger a adelanta cu tin un lista largo di careteranan nobo cu ta bay wordo construi y tambe esnan nobo den e diferente barionan. Di e ultimo aki

el a splica, cu asina cuminsa cu proyecto di renobacion di un bario, e parti di caretera ta wordo inclui di biaha. “Nos ta cambiando e infraestructura di nos barionan pa uno dirigi riba e hende y no auto,” el a comenta. Den cuadro di e inversionnan cu ta wordo haci den infraestructura, e mandatario a splica cu e departamentonan concerni hunto cu conseheronan di Gobierno ta evaluando material nobo cu por wordo uza den p.e. careteranan. Un di e tecnologianan cu Gobierno a ricibi presentacion di dje, ta esun cu ta haci e santo duro, sin cu mester pone asfalt. E producto aki ta wordo evalua principalmente pa areanan cu ta keda den naturalesa cu no kier pa wordo dañá cu uzo di asfalt. Un di e proyectonan grandi cu ta bay den ehecucion den e periodo di Gobernacion aki ta Green Corridor, cual trabou ta bay wordo realisa door di e empresa Colombiano ODINSA. Ta trata di un proyecto di mas di 75 miyon dollar, cu ta encera construccion y mantenion di e area Green Corridor. E proyecto mes ta encera ampliacion di e caminda di 7 km, for di aeropuerto te

cu Pos Chikito cu lo bira dobel via, pero tambe 23 km di caminda cu ta bay wordo renoba completamente y construccion di 13 km di via pa bicicleta. E trabounan prome cu GC ta encera un conexion na Seroe Thijshi pa yega Barcadera. Na momento cu esaki ta cla, probablemente mey-mey di aña, e trabounan di GC mes ta cuminsa. E lo tin un duracion di 30 luna mas o menos, sperando cu e lo por wordo entrega na 2016. Den cuadro di e ariba menciona, Gobierno lo cuminsa na mesun momento cu preparacionnan pa construccion di Ringweg (RW3), cu su destaho lo mester tuma lugaden e proximo dos lunanan pa e trabou di construccion mes por cuminsa na 2015. Gabinete Mike Eman II ta spera cu tanto Green Corridor como RW3 lo ta cla pa 2017 dunando Aruba un cambio completo den conexion entre e areanan pabou y pariba y alabes permitiendo un miho fluho di trafico pa e proximo 20 añanan. Minister Sevinger a bisa cu e proyectonan ta indica cu e expansion di infraestructura di Aruba lo ta uno grandi den e gobernacion aki.